



Ruopsis já vielgis piäiváš

Tälvi lii lamaš kidâ máddáápiäláá Suomâ räi muottii. Mij lep peessâm navdâšid čuoigâmist já olgon liihâdmist. Olmâ tälvi lii lamaš Sivnedeijee skenkkâ mijjân, spiekâstâhtile tiet vaibâm eellim vandârdeijeid. Pispekode taveosijn tälvi vala haaldâš luándu, mutâ ääigi mielđ piäiváš suddâd kossâ-uv muotâkeerdijd kolgee aajân. Kiidâ iimâš lii vuod tääbbin forgâpalij.

Tai kiidâ vyerdim tobdoi ooleest muu lii aabâs eromâšávt kuoskâttâm pessijâssalmâ 105, Mii Piäiváš pajanij. Tom lii sannim Kalajokileevi vyeliuásist Rautiost meddâl orroo eennâmviljâleijee, aalmugovdâsteijee já lestadiolâš pappân vihkâmettum sárnideijee Leonard Typpö (1868 – 1922).

Saalmâst lii ton sänneijee päikkikuávlun já lestadiolii oskokiellân lohtâseijee suujâi tiet noonâ čonnâsem Oulu pispekoodân. Tondiet láá-uv nabdâm saalmâ Oulu pispekode nommâsalmân. Oro eromâš pyerrin, ete pispekode salmâ lohtâs eidu pessijâid, ristâkode stuárráamus juuhlân.

Maŋgâsijd lii kuoskâttâm saalmâ saje, mast eteh váhá tivtâlávt já syelimâšávt ”piäiváš lii riistâ alne vielgâd já ruopsâd”. Maid taat kielâkove uáivild? Piäiváš lii kove Kristusist. Kristus-piäiváš páštâ riistâ alne ruopsâdin já vielgâdin. Ruopsâd lii Jeesus soovâdvoorâ ivne. Tot viestâd kuhesvástuppeeivi tábâhtusâin. Kristus soovâdvorâ voordij mii sudoi tiet. Vielgis piäiváš čuujoot pessijâi iimâšân, ko Kristus pajanij já vuoitij jäämmim väälđi.

Muu jieččân uásild puáttee pessijâid kulá kuhháá vuordum Ylivieska uđđâ kirho vihkâm. Mun toimâttâm vihkâm eidu vittâ ive ton maŋa, ko puáris kirho hirmástuttee pyellim tábâhtui. Talle Ylivieska ulmuuh juttii teddum oivijguin sii ráhis puállám kirho pasâttâsâi luus. Ylivieska ulmui soron servii maŋgâseh pirrâ eennâm, ko sij kullii vááimun čyeccee uđđâs kirho pyellimist.

Puáttee pessijâi, vittâ ive maŋeláá, tubdâmušah láá aabâs ereslágáneh. Mij uázžup keččâđ uđđâ mučis Ylivieska kirho, mii lii tego pajaspajanem iideed iimâš. Tot lii konnjâlij já kuunâ kooskâst šoddâm ilo katedraal. Jo jieijâs eksistens peht tot muštâl siämmáá mainâs, mon engâl almottij hiämâskâm nisonáid kuarus häävdi piällást: Jeesus lii pajanâm jâmmimist.

Taan Ylivieska servikode stuorrâ juhleest, Kalajokileevi kierruin, mij lávlup ovdil mainâšum Leonard Typpö saalmâ Mii Piäiváš pajanij. Čyeti ihheed ton šoddâm maŋa salmâ skáájá uđđâ kirhoost já julgáášt Kristus, kote lii riistâ alne vielgâd já ruopsâd; Kristus, kote lii sovâttâm mii suddoid já vuáittâm jäämmim.

Ylivieska kirho vihkâmjuhle lii oles Oulu pispekode juhlepeivi. Servikodeh Perhost kidâ Ucjuv räi servih ilon. Kristus pajanij jâmmimist, tuodâi pajanij!

Ovdláhháá pessijâi 2021,

Jukka Keskitalo
Oulu pispekode pispes